

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Area ia haapae oe ra, e tahinu i to upoo, e e horoi i to mata;

“Ia ore ta oe haapaeraa maa ia itea e te taata, e to Metua râ; e na to Metua iho, tei ore roa i moe te hoê mea ia'na ra, ore noâ oia iho i te itea, e faautua faaite mai ia oe.”
Mataio 6: 17, 18.

Nu. 11.

10 Atete, 1911.

Mat. 4.

Te Haapaeraa Maa.

“Ua faaite atura vau i te hoê haapaeraa maa i reira i taua pape ra o Ahava, ia faaahoaho ia matou i te aro o te Atua, ia imi hoi i te tahi e'a maitai no matou, e no ta matou mau tamarii, e no ta matou tao'a atoa.

“Ua haapae ihora matou i te maa, e ua imi i to matou Atua i taua mea ra, e ua faaroohia mai matou e ana.” Ezera 8: 21, 23.

Ua horoa mai te Atua i te tino i'o e te toto i te taata e fare no to'na varua, e e hiero hoi no te Varua Maitai. E no reira ua au roa i te taata ia haapao maitai i to'na ra tino ia ore ia ino, e o tei haapao maitai, e haamaorohia to'na pue mahana i roto i te ao nei. O tei faaino i to'na iho ra tino, ua faaino oia tei horoahia e te Atua. Ia faarue te taata e hope roa'e i te mau peu atoa o tei faatupu i te paruparu i roto i te tino, ei to'na ra mau melo atoa e tia'i. E rave rahi te taata i te mau fenua moana nei o tei hamani ino i to ratou ihora mau tino na roto i te amu puai rahi i te mau huru maa au ore. E te hoê a'e tumu te reira i roohia'i ratou i te ma'i

opu, ua rau i te huru. Ua tuu mai te Atua i te mau maa huru rau ei maitai no te taata nei.

Ia faaau maite te taata i te amuraa i taua mau maa ra, ei tino etaeta, e te puai hoi to'na. Ia ore râ te taata ia faaau maite i te amu i te maa e hamani ino i to'na ihora tino, e no reira e amu te taata i te maa, e ia maha atura te hinaaro, atira ia i reira. Eiaha ia tamau i te faarahi i te amu noa, no te mea, e faainoraa ana'e ia te reira i te tino. Uiraa: E mea au anei i te taata ia haapae i te maa? Pahonoraa: E, ua au hoi ia. Teie râ, e mata na i te imi i te parau i papaihia ra, ei reira tatou e ite ai e e mea au anei te haapaeraa maa, e e haapaoraa anei i faauehia mai e te Atua? E aore anei? A taio tatou i tei papaihia e te peropheta ra o Isaia, i te na ôraa mai e:

“Eaha matou i haapae ai i te maa, e aore oe i hi'o mai? E i faahaehaa'i i to matou varua, e aore oe i haapao mai? Inaha! i te mahana e haapae ai outou i te maa ra, te oaoa ra outou; e ta outou mau ohipa i faaue ia ravehia ra, ua titau outou e ia hope roa. Inaha, te haapae na outou i te maa ei mârôraa, e ei tama'iraa; e ia moto i to outou rima rave ino. Eiaha outou e na reira i te haapaeraa maa mai tei teie nei mahana: i te faateiteiraa i to outou reo i nia ê ra. Mai te reira anei te haapaeraa maa hinaarohia e au ra; ia faahaehaa te taata i to'na varua i te mahana hoê nei? e ia pi'o anei to'na upoo i raro mai te ohî, e ia vauvau i to'na roi i te ahu oto e te rehu auahi? e parau anei oe i te reira i te haapaeraa maa, e e mahana au na Iehova? E ere anei teie i te haapaeraa maa hinaaro na'u ra? ia tatara i te rûrû ra o te ino; ia haamairi i te hopoia teiaha ra; ia tuuhia tei neneihia e tei hamani ino ra; e ia ofatihia e outou te mau zugo atoa ra? E ere anei ia tufahia ta oe maa i te feia i poia ra; e ia aratai i te taata rii i ati ra i to utuafare? e ia ite oe i te veve ra, ia faaahu atu oe ia'na, e eiaha oe e tapuni i to oe ihora hoi tino?” Isaia 58: 3-8.

Te ite nei tatou na roto i teie parau ta te Atua i hinaaro ia ratou i te reira ra anotau na roto i te haapaoraa i te haapaeraa maa, oia hoi, ia tatara i te ino, ia tuuhia'tu tei hamani-inohia, ia faaamu atu tei poia, ia tauturu hoi tei ati ra, e ia faaahu atu tei veve ra. E e ohipa aroha ana'e ia, o tei au maitai i to te Atua ra hinaaro. A hi'o atoa i Ioela 2: 12.

A parahi mai ai Iesu i roto i teie nei ao ua haapao i hora oia i te haapaeraa maa. A hi'o na tatou i te taime i arataihia'i oia e te varua i te medebara ra, ia faahemahia e te diabolora, ua haapae i hora oia i te maa e maha ahuru o te rui e maha hoi ahuru o te ao. E ua na ô hoi oia, "O vau te e'a." E ua faaite papu e ua faatia hoi oia i te haapaoraa haapaeraa maa i roto i ta'na ra a'oraa i nia i te mou'a ra. Mataio 6: 16-19. E i roto hoi i ta'na pahonoraa'tu i te mau pîpî a Ioane. Mataio 9: 14-18. E i reira ua haapii atu oia ia ratou e, te vai atura râ te tau e hopoi-ê-hia'i te tane apî ra (o Iesu iho â), ei reira ta'na mau pîpî e haapae ai i te maa. Uiraa: Ua haapao anei te mau pîpî a Iesu i te haapaeraa maa i muri a'e i ta'na reva-ê-raa? Teie te parau ua na reira mau ratou, mai ta'na i parau ra. Te na ô maira te parau: "E te haamori ra ratou i te Fatu ma te haapaeraa maa, ua parau maira te Varua Maitai." Ohipa 13: 2. Teie atoa te tahi parau: "E ia haapaohia e raua te peresibutero no ratou i te mau ekalesia atoa ma te pure e te haapaeraa maa, ua pûpû atura raua ia ratou i te Fatu, i ta ratou i faaroo ra." Ohipa 14: 23. Teie mau parau i haapiihia i te anotau tahito ê ra. E teie nei râ e taio tatou i te hoê parau ta te Atua i heheu mai i to'na ra tavini ia Iosepha Semita, oia hoi: "E te mau Feia Mo'a atoa o te haamana'o e o te haapao mai te rave i teie nei mau parau, mai te pee e te haapaoraa i te mau faaueraa, e maitai te noaa i to ratou ra mau pito, e e puohia to ratou ra mau ivi, e iteahia hoi ia ratou te paari e te vairaa rahi no te ite, oia hoi te paari i hunahia ra; e horo hoi e e ore e rohirohi, e haere hoi e e ore e fiu; e te faaite atu nei au o te Fatu ia ratou i te parau e, e e fariu e atu te melahi taparahi ia ratou mai ia'na i na reira i te tamarî a Iseraela ra, mai te taparahi ore ia ratou." B. F. S. 86: 3. E ua faaue mai te Atua i te Feia Mo'a i te anotau hopea nei ia haapae atoa i te maa. Te na ô maira te parau i roto i te Buka Fafau e:

“Te tuu atoa atu nei au i te hoê faaueraa, ia faaea maite outou i roto i te pure e te haapaeraa i te maa mai ô nei atu â.” Pene 85: 21. Eaha te faufaa e noaa'i na roto i te haapaeraa maa? Teie ia, e faahaehaa ia tatou iho i mua i te aro o te Atua, e ia faariro te varua ei fatu mau i nia iho i te tino, ia auraro maite te tino i ta te varua ra. Teie atoa te hoê a'e mau tumu no te haapaeraa maa i ô te Feia Mo'a, oia hoi, e ravea ia ia faatupu i te hinaaro i roto i te aau o te taata nei, te varua parau mau no te aroha no te Atua e te taata atoa, ei aau horoa noa e te hamani maitai, ia noaa te maa, e te tahi atu â mau mea e au na te feia i ere. Riro atura taua haapaeraa maa no ratou, ei oaoaraa no te feia o tei vai noa ra i roto i te mau ati huru rau. E ia faaea rii te tino i to'na ra ohipa, e ia faahaehaa ia'na, e ia tamâ i te aau, ma te faateitei i te varua i nia iho i te tinora. Na te pure e te haapaeraa i te maa e faatupu'i i te haehaa o te tino, e te faaetaetaraa i te varua o te taata nei. Te haapapu nei Iesu i teie nei mana'o i roto i Mataio 17: 14-21. Ua parau mai te mau pîpî ia'na, na ô maira: “Eaha i ore i tia'i ia matou ia tiavaru ia'na i rapae?” Ua parau atura Iesu ia ratou, na ô atura: “No to outou faaroo ore”, e ua haapii papu Iesu ia ratou, “Eita te reira huru demoni e tae noa i rapae; maori râ i te pure e te haapaeraa maa.” No reira te tiaturi papu nei matou i taua parau a te Mesia ra no te haapaeraa maa ei parau mau, e ei tumu ia noaa'i te maitai, no ô mai i te Fatu ra: “E ua tia ia vai ia faaite atu ia'na i to'na parau? Na vai e parau atu e, ua hape oe?—ISAATA.

“E teie nei, e au mau taeae here, ua hinaaro vau, ia haere mai outou i te Mesia, oia Tei Mo'a i Iseraela nei, e rave i ta'na ora, e te mana o ta'na faaoraraa. Oia ia, e haere mai ia'na, a pûpû mai ai i to outou aau atoa ei ô na'na; e pure, e haapae i te maa, e e haapao maitai e tae noa'tu i te hopea ra; e te ora ra te Fatu, e ora'i ia outou.” Buka a Moromona; Omoni 1: 26.

Te Parau Tuatapapa no
Iosepha Semita.

(TUATIRAA.)

PENE XI.

MATAHITI 1830.

*Te mau taata i baptizohia i Colevile (Colesville). Ua rave-
hia Iosepha e na taata mana. Mai ore mai ora Iose-
pha i te rima o te feia hamani ino. Ua hamani-ino-hia
oia mai ta te Mesia ra.*

I OTI a'era te amuiraa i te 1 no Tiunu i te matahiti 1830,
ho'i atura Iosepha i ta'na ihora utuafare, no te mea ua
huru maoro i te moe-ê-raa'tu ia ratou. Muri iho haere
atura Iosepha e ta'na vahine o Ema, ratou o Olive Taudere,
e Davida Vitima, e o Ioane Vitima i te oire ra o Colevile
(Colesville). E rave rahi to reira feia, ua faaroo i te Atua,
e i ta'na ihora ohipa, e ua hinaaro ratou ia baptizohia, e ia
farii mai i te Varua Maitai, e ia amui-atoa-hia'tu i te amui-
raa Feia Mo'a. Ua mana'o a'era Iosepha e, ia baptizo atu
ia ratou i te mahana Sabati. No reira i te ahiahi Mahana
Maa ra, ua paruru a'era Iosepha ma i te tahi pape tahe
papau ra, ia haapahuhia, ia au ei vahi baptizoraa.

Ua itea tei opuahia e Iosepha ma e te amuiraa feia iino,
e i taua po iho â, haere atura ratou, e ua iriti noa i taua
paruru pape ra. No reira i ore i oti ai te feia i te bape-
tizohia i taua mahana ra. Poipoi roa mahana Monere, ua
paruru faahou Iosepha ma i taua pape ra, e hou te taeraa
mai o te enemî, ua baptizo atu ai Olive Taudere i na taata
13, e o Ema te vahine a Iosepha te tahi o taua mau taata
ra. E e taime oaoa rahi te reira no Iosepha. E ia oti a'era
te feia i te baptizohia, haere ana'e maira te amuiraa o te
feia iino, tamata ihora i te faatupu i te peapea, aita râ te

mau taeae e mārô noa'tu ia ratou, no reira aita a'era a ratou e otoheraa ia hamani ino i te mau taeae i reira.

Ua faataahia e te mau taeae te hoê pureraa i te ahiahi ia haamau tei papetizohia ei melo i roto i te ekalesia. E ia haaputuputu a'era ratou i te ahiahi, inaha, ua tae maira te tahi taata mana, e tei to'na rima te tahi parau pariraa ia Iosepha i te hara orure hau, e te faananeraa i te fenua ra i ta'na a'oraa'tu i te Buka a Moromona. Aue hoi e!, i te pariraa tumu ore e! E ua aratai'tura oia ia Iosepha i rapae au, haere'tura raua na nia i te pereoo. Aore roa Iosepha i patoi noa'tu i taua taata toroa ra, auraro maite ihora. E i reira ua mārû a'era te aaui o taua taata ra, e ua faaite'tu ia Iosepha e, e mea tia ore roa to'na raveraahia, e te tumu mau hoi no te reira, teie ia, oia hoi ia tuuhia'tu oia i te rima o te enemi, o tei tia noa ra i te pae aratia. Ei reira ua tupu ihora te mana'o i roto i taua taata toroa ra eiaha etuuhia'tu Iosepha i roto i te rima o te feia hamani ino. Haere noa raua aita e maoro ua farerei maira ia ratou. E ua opua na ratou ia haru Iosepha ia tae mai. E tae a'era, ua tia ratou i te tahi tapao no tei aratai mai, a haru atu ai ratou ia'na, aita râ oia i tuou noa'tu ia ratou. Area râ ua tairi puai oia i te puaahorofenua, faahoro u'ana'tura, peehia maira raua e te enemi, aita râ i roohia, hemo ihora ratou, ora'tura. E tae atura raua i te oire ra o Baniribiridi Apatoa (South Bainbridge) i te tahi mataeinaa ê. E ia ahiahi, ua tarahu ihora raua i te tahi piha taоторaa. Ei reira ua horoa'tu te taata toroa i te roi ia Iosepha ei taоторaa, e tei to'na rima te tahi pupuhi e ua tia maite oia e ao noa'e te rui, ia ore Iosepha ia hamaniinohia. Muri iho i to Iosepha aratai-ê-raa-hia e a'na, mai roto atu i te putuputuraa taeae, ua ore te pureraa i reira. Mai reira haere atura Iosepha Naita, e ua faaau oia i te parau i na taata ite i te ture fenua nei o James Davidson raua o John Reid, ei na taata paruru ia Iosepha i roto i te haavaraa. Aore roa te tahi o teie na

taata i ite na ia Iosepha, ore noa'tu i te reira, ua faatia râ raua ia riro ei paruru no'na.

Muri a'era ua parau maira te taata ra o John Reid, a tae mai ai Iosepha Naita ia'na ra, aore oia i hinaaro, no ta'na ohipa rahi ia haere atura ei paruru ia Iosepha. Area hou e tia'i ia'na ia pahono'tu, eiaha, faaroo a'era oia i te hoê reo mārû papu roa i te parauraa mai ia'na ra, i te na ôraa mai e, "Haere oe e faaora i to Iehova taata i faatahi-nuhia ra e tia'i." Ua ite oia e, ua a'ohia mai no to te ra'i, no reira ua farii oia i taua aniraa ra ma te mana'o papu roa ra e, e manuïa. Ua parihia Iosepha i roto i te haavaraa e te hoê enemi no'na, o Seymour to'na i'oa, no te haapaoraa Peresebeteriana, e ua tamata ihora oia ia faahapa ia Iosepha na roto i te mau parau o te mau ite haavare. Area ua paruru-maite-hia Iosepha e ta'na na paruru. E ia faaroo a'era te haava i te mau parau i faaitehia mai e te mau ite, ua tuu atura oia ia Iosepha ei taata tiamâ roa. Inaha, ua tae mai te tahi taata toroa ê, e ua rave maira ia Iosepha, e ua afaihia e a'na i te oire ra o Coleville (Colesville) ia haavahia i reira. Ia po râ parahi ihora raua i te hoê faretipae-raa. Ei reira ua parauhia e vetahi mau taata e taua taata toroa ra, e haere mai ei tanturu ia'na i te faahopo e te hamani ino ia Iosepha.

A parahi noa ra ratou i taua piha ra, ua tuhi ratou ia'na, e ua tufa'tu i te huare i ta'na mata, e ua tâhitohito ratou, i te na ôraa'tu e: "A tohu oe i te parau." Ua faaoro-mai maite oia i ta ratou hamani ino; e ua haamana'o'tu i te parau a te Fatu ra, i te na ôraa e: "Aore te tavini i hau i to'na ra Fatu. I hamani ino na ratou ia'na e hamani ino atoa ia'u." Aita a'na e maa i amu na, mai te poipoi, e po noa'tu te mahana, no reira poia ihora oia, e ua ani atu i te maa. Aita'tura maa i horoahia mai ia'na ra, maori râ, o te faraoa marô rahi paari roa. E ao a'era ua haava faahou ratou ia'na. Hoê â ia mau taata i tae mai ai ei tamata i te faa-

hapa ia'na, o tei tae mai ei mau ite i te haavaraa matamua. E ua tae atoa mai na taata ite i te ture fenua nei, ei paruru ia Iosepha. Aita'tura te haava i farii mai i te parau o te mau ite haavare. Ora faahou'tura Iosepha, no te mea aita roa a'na hara i iteahia. No te mau parau ta te mau enemi no Iosepha ua faaroo i roto i te haavaraa, riro maira te tahi pae o ratou, ei hoa mau no'na. E o taua taata toroa iho â te tahi ua na reira, e ua faaite mai oia ia Iosepha, te amui noa ra te tahi pūpū taata iino, i rapae i te fare, e te tia i ra ratou ia'na, e ia noa ra, ei reira ratou e parai ia'na i te tâ, e e tapiripiri hoi i te huruhuru moa. E i reira ua aratai atura te taata toroa ia'na i rapae au i te oire na te tahi e'a ê, haere'tura Iosepha mai te peapea ore. E no reira ua morohi noa'tura ta ratou opuaraa ino.

I te avae Tiurai, 1830, ua vaiiho Olive Taudere ia Iosepha, haere atura i te oire ra o Faete e rave i te ohipa. Ua monohia oia e Ioane Vitima ei papai parau na Iosepha. E i reira ua haamata raua i te papai faahou e te faanehenehe hoi, i te mau parau heheu i fariiha e Iosepha. E e rave rahi tei horoahia mai, e e faanehenehe raua i te reira e tia'i, ia vai maite â ia ei faufaa rahi na te ekalesia i te mau tau a muri atu.

—VILIAMU SETEMILA.

(E tuatihia mai teie parau.)

Te Riri Maha Ore o te Varua Pohe Mae.

(TUATIRAA.)

[A pohe Iosepha ma, ite ihora te varua pohe hae e, te vai nei te mau aposetolo ei aratai i te ekalesia. Ua faatupu ihora oia i te peapea i roto i te ekalesia; taiva'tura Viliamu Semita, e Laimana Uaita, e o Viliamu Mareko ma, e e rave rahi atu â. Ua faatupu te diabol o i te riri pohe hae i roto ia ratou, eiaha ratou e auraro i te faatereraa a te mau apose-

tolo, haere atura ratou e ua faatia haere i te ekalesia apî, na ratou iho, ia riro ratou ei mau pŭpŭ patoi i te ekalesia mau. Ua tamau ratou i te patoi i te ekalesia ta te mau aposetolo i aratai, e aita i manuïa, mai reira e tae noa'tu i te mau matahiti i muri mai. Ua faatupuhia te mau pŭpŭ taata no'na, mai te au i te mau tau atoa. E ua tuu oia i te itoito e te puai no ratou ia haaputuputu i te mau toetoea rii taata no roto mai i te mau amuiraa o tei parau ia ratou iho e, ekalesia raton. Ua horoa oia i te puai e te itoito fiu ore no ratou, ia imi ratou i te mau huru patoiraa'toa. Ua faatupuhia te peapea i nia i te ekalesia i Navu e ua reva te ekalesia i nia i te mau Mou'a Ofai, e tei reira ratou i teie nei.

E no te iteraa te varua pohe hae tei reira te ekalesia, ua faatupu te diabololo i te riri pohe hae i roto i te mau taata ia nenei i te mau vea patoiraa i te ekalesia ia ore te ekalesia ia manuïa i te mau vahi ta'na e haere.

I te matahiti 1843, ua tonono mai Iosepha (metua) i Turuati ma i te mau fenua moana nei, e ua faatia i te mau amaa ekalesia e rave rahi. Ia ite râ te varua pohe hae e, ua farii to te Tuamotu i te evanelia, ua faatupu oia i te riri pohe hae i roto i te amuiraa taata o tei parauhia ra e, te ati Iosepha, oia hoi, te mau Sanito. E ua imi tapapa mai ratou i te mau vahi tei reira te Ekalesia a Iesu Mesia i te Feia Mo'a i te Mau Mahana Hopea Nei. E inaha, tei te Tuamotu roa mai nei ratou. E i to ratou taeraa mai, aita'tura ia e ohipa ta ratou i haamata, maori râ, te tiarepu e te faaheporaa i te ekalesia tei faanohohia e Turuati ma, i nia i te mau Motu, e te tuuraa mai te mau parau patoiraa i te ekalesia ta te mau aposetolo i aratai. No reira ia ite mai outou atoa e, tei te Tuamotu mai nei taua pŭpŭ taata, e i to'u hi'oraa'tu ua riro ratou ei parahiraa mau no te varua pohe hae.

Te mau buka, e te mau vea, e te mau haapiiraa, e te mau mitinare, ta ratou i haapono haere i te mau vahi atoa, aita'tu ia e parau rahi ta ratou i faaite haere, maori râ, o

Birikama Youne e te vahine rau, e rave rahi atu â. Eaha râ te tumu i na reira'i ratou, no te hinaaro anei i te faaite i te parau mau? E ere paha. Mai te mea e, no te faaite i te parau mau, ahia a'enei matahiti i teie nei, te faaite-raahia taua mau parau nei? Eaha hoi te tumu i ore i faaite atoa'i e, o Iosepha na tei farii i te heheuraa no te vahine rau i te 12 no Tiurai, i te matahiti 1843, mai ta te Porositani i faaite i roto i te buka i parauhia ra e, "Roto Miti e To'na Hoturaa." E ere paha e, no te hinaaro mau i te faaite i te parau mau, no te inoino râ o te aau. Aita'tu mau ekalesia ta ratou e patoi puai atu nei, maori râ, o te Ekalesia a Iesu Mesia i te Feia Mo'a i te Mau Mahana Hopea Nei, o tei arataihia e te mau aposetolo. Eaha râ te tumu mau i na reira'i ratou? No te riri maha ore o te varua pohe hae, o te tumu mau ia, aita'tu.—T. a MAIRE.

Arearea Rahi no te 14 no Tiurai, 1911.

I TE mahana 13 no Tiurai i haamatahia'i te oroa rahi no te hau Farani i Papeete nei, ei te tuiira rui i te 16 i faaotihia'i. Horatoru i te mahana 13, ua haamata te mau fare rii faarearearaa, i te mau huru peu rii. Hora vau i te po tairururaa faaineineraa no te mau himene e te mau otea, i nia i te Mahora o te hau, i raro a'e i te mau tiaramaraa mori uira, mori hinu e te mau mori Tinito atoa, e mea nehenehe. I te 14 te mau faatitiauraa pereoo taataahi faahororaa puai. Tei ravehia i te ahiahi, oia te mau himene e te otea. E ia oti a'era ua ravehia te mau huru arearea hautiraa tamarii, oia hoi, tipaupauraa anani, tipaupauraa huero moa, o'uarua pute, e te vai atura. I te 15 te faatitiauraa no te mau huru boti, e te mau vaa hoi. E piti a'e pereoo taninito tei faaterehia i te mau mahana e te mau po hoi no te arearea. A tere noa'i, ua faatai-noa-hia e raua te upaupa navenave ei faarearearaa i te mau taata. I te 16 tuharaa rê na tei rê i te himeneraa, otea, etc. Ua haapaohia te mau rê na te mau huru peu atoa. Hora iva i te po faatereraa boti, o tei faaunaunahia, e tei faaturamahia, e te taverehia e te mau boti uira, e mea faahiahia. I nia i te motu iti ra i Motuuta te vahi i haruru noa te mau ahitiri, e ua rau to ratou huru i te peeraa i nia, e mea nehenehe e te arearea no te mau taata.

Te Mau Parau Api.

TE poro atu nei Te Heheuraa Apî i to'na mau hoa Ekalesia no te mau fenua Tuamotu, ia tae ana'e mai ratou i Takume, te vahi i haapao-hia no te amuiraa i te Atopa i muri nei.

Tei te oire ra o Vandalia, i Amerika, te tahi tamahine o Hazel Schmidt to'na i'oa. I taoto na oia i na mahana e ono ahuru ma pae (65) e ia hope a'era, ua araara maira, ani atura i te maa. Ei reira ua haaparahi ratou ia'na i nia i te tahi parahiraa, faaamu'tura i te maa. E i muri iti iho, varea faahou oia i te taoto. Ua rohirohi roa to te utuafare i te tia-noa-raa'tu, a taoto noa'i oia. Ua tamatahia e ratou te mau ravea i iteahia e te mau taote, ia faaaraara'tu ia'na, aita râ i manuïa, te taoto noa ra oia.

E mataro mau te arii apî ra o Tihoti pae no Beritani. E tae a'era i te ahuru ma piti o to'na ra matahiti, ua haere oia i nia iho i te pahi manuâ e haapii ai. E tae a'era i te hoê ahuru ma maha o to'na ra matahiti, ua haaati oia i te ao nei, na nia i te tahi pahi atimarara rahi. Ua rave noa oia i te ohipa na nia iho i te mau pahi, hoê ahuru ma pae matahiti. E ua hope te mau ohipa i te haapiihia e a'na, e ua noaa ia'na te mau toroa pahi mai te mataro rii ite ore i te ohipa e tae noa'tu i te raatira rahi faatere. I parauhia ra e, ua riro ihora oia ei ihitai paari, e te aravihi rahi.

I te mahana 22 no Tiunu i mairi a'enei i te oire ra o Lonedona, i Beritani, ua faakoronahia Tihoti pae e ta'na vahine o Maria na arii no Beritani. E oroa iti rahi faahiahia e te hanahana rahi o tei haapaohia i taua mahana ra. Ua tae i reira te feia mana e rave rahi no te mau basileia, ei mataitai atu ai i taua faakoronaraa ra. Ua faakoronahia na arii i roto i te fare i parauhia Westminster Abbey. Ua haaputuputu te feia o tei parauhia e hitu tausani (7,000) i roto i te piha faakoronaraa, hou te taeraa mai o na arii. I muri iho i te taeraa mai o na arii, e te feia mana toroa e hope roa'e, ua haamata ratou i te oroa. E i reira ua haapao i te mau peu no te faakoronaraa, e ia oti a'e i te hoê a'oraa parau poto, ua hôi te arii i te Bibilia, e ua papai to'na ra i'oa, ma te tapu e te fafau hoi e faatere oia i te hau e au i te mau ture no te basileia, e e tamau, e e faatia hoi oia i te haapao-raa Porosetani. Ua faatahinuhia te arii e te episepoko rahi no Canterbury, e ua tatuhia i te 'o'e no te hau, e ua faaahuhia i te tahi ahu arii, e ua horoahia'tu te tapea e te setepa arii ia'na. Ei reira ua tuu maite ihora te episepoko i te korona arii i nia iho i to'na upoo, ei reira ua faaoto puai rahi te pûpû taata faaoto pu i ta ratou mau pu, e ua pii hua'tura te re'o o taua nahoa rahi taata ra, i te na ôraa'tu e: "E faaora te Atua i te arii." E ia oti a'era haere'tura te arii i nia iho i te terono parahi ai, e i reira ua faatura'tu te episepoko, e te fetii arii ia'na, ma te faatiaia'tu i te korona i nia iho i to'na upoo, e ma te hôi i to'na paparia.

E pau rahî aueueraa fenua tei te Oire Mexico, i Amerika i te 7 no Tiunu. Ua pau te tahi fare parahiraa faehau, e e vairaa-mauhaa tama'i atoa ia no te nuu. Te taoto ra 70 faehau i roto a mairihia'i ratou e te fare, tapoi-roa-hia'tura, pohe roa ihora. E rave rahi te taata tei pohe roa, e o tei haaparuparuhia i mairihia ratou e te mau fare. A faaea'i te aueueraa fenua, e harururaa mata'i (gas) tei te hoê fare o te hau hamaniraa mauhaa tama'i, e ua puehu a'era te mau mea i roto ra, e e mea riaria rahi hoi te reira.

Ua amuihia te mau orometua Haapiiraa Sabati, no te mau fenua e rave rahi, i te 23 no Tiunu i mairi a'enei, i te oire San Francisco. Teie te tumu i na reirahia'i ratou, oia hoi, ia feruri, e ia imihia e ratou te mau ravea e maitai ai te ohipa no te Haapiiraa Sabati i te mau fenua e rave rahi. E ia ahiahi ihora ua haapao'tura ratou i te tahi nanai-haere-raa-taata e vau tausani (8,000) na nia i te mau aratia, e tei te rima o te mau taata e hope roa'e te hoê bibilia i te afai-haere-raa. Riro'tura te reira ei tapao faaite e, te tamata nei ratou i te haapao i to te Fatu nei hinaaro, e ia faatupu hoi ratou i te parau-tia i nia iho i te fenua nei.

I te 29 no Me i mairi a'enei, ua faarue atura te tahi pahi Amerika tira maha ta ie, o Puritan to'na i'oa, i te oire ra o Newcastle, i Ausaralia, te haere atura i te oire ra o San Francisco, i Amerika. Ua faatomohia taua pahi ra i te arahu. E e 27 taata tei nia iho ia'na. E tere maitai ta ratou e tae noa'tu i te area i ropu Rapa e te motu ra o Tematagi. Ei reira roohia ihora te pahi i te ino, haamama ihora, riuhia a'era, ua faaitoito noa te mau mataro i te pamuraa'tu i te riu, aita râ a ratou e ravea e pau ai, ua tupu noa'tura i te rahiraa, e ua teiaha roa te pahi, fatata a'era i te tomo. Ei reira ua faarue ratou i te pahi, haere ana'e atura i nia iho i na boti e piti. Tere'tura i na mahana hoê ahuru aore i te pae apatoerau 750 maile, mai te vahi i faaruehia'i ratou i te pahi, tapae'tura i te fenua Anaa. Ei reira ua fariihia, e ua faaherehere-maite-hia, e ua faaamu-maitai-hia ratou e to Anaa. Tupu ihora to ratou mauruuru i te rahiraa. E i na mahana i muri mai haere'tura te raatira, e na taata toomaha i roto i to ratou boti, tere'tura, e i na mahana e hitu tapae maira i Tahiti nei, i te 12 no Tiurai. Muri a'era ua tae ana'e mai to ratou mau taata tei toe'tu i Anaa, na nia mai ratou i te tahi boti ta ie tira hoê, o Pârau te i'oa. Ora ana'e atura ratou.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.